

# E 10 mandatonan di CURPA



## 1. ARUBA LO TA OFICIALMENTE UN NASHON BAO DI DIOS BASA Ariba e fe cristian

Partido CURPA lo bin, manera nan drenta den gobierno, cu un ley cu lo hasi Aruba

oficialmente un nashon bao di Dios basa ariba e fe Cristian. E Palabra di Dios ta bisa den Salmo 33:12 "Bendishona ta e nashon cu su Dios ta SEÑOR". Si Aruba kier disfruta di e bendishonnan di Dios, nos mester yama Aruba ariba nivel politico un nashon bao di Dios basa ariba e fe Cristian. Mundo henter lo sa y tin di respecta esaki.

## 2. TUR INSTITUSHON POLITICO, DEPARTAMENTO DI GOBIERNO, COMPANIA ESTATAL, SKOL Y AREA PUBLICO, LO TIN E 10 MANDAMENTONAN DI DIOS VISIBLE PA TUR HENDE POR WAK

Partido CURPA lo bin cu un ley, manera cu nan drenta gobierno, cu ta stipula cu tur institushon politico, departamento di gobierno, empresa estatal, skol y area publico lo tin e 10 mandamentonan di Dios visible pa tur hende por wak. Mustrando e 10 mandamentonan lo demonstra cu gobierno ta onra Dios y ta pone importancia na moralidad.

## 3. LO TIN OFICIALMENTE UN DIA NACIONAL DI ORASHON.

Actualmente tin un dia nacional di orashon cu ta basa ariba un permiso. CURPA, manera nan drenta gobierno, lo percura por medio di un ley cu Aruba lo tin oficialmente un dia nacional di orashon na unda cada un ciudadano na nan manera por dedica nan mes na orashon, particularmente pa e nashon. E dia aki lo ta un dia liber. Orashon ta un arma poderoso pa e individuo y pa un nashon.

## 4. ARUBA LO NO BAI DI ACUERDO CU TRATADONAN INTERNACIONAL Y REGLANAN DI REINO HULANDES CU TA BAI CONTRA PRINCIPIONAN DI DIOS.

Como un nashon di Dios Aruba tin di percura cu e soberinidad di Dios Su principonan ta keda intacto. Tratadonan internacional y reglanan di Reino Hulandes cu ta bai contra principonan di Dios mester wordu rechaza dor di Aruba. Cu CURPA den gobierno tratadonan internacional y reglanan di Reino Hulandes cu ta bai contra principonan di Dios lo no wordu aproba pa conta pa Aruba.

## 5. NO TA PERMITI PATRONAHE POLITICO

Patronahe politico ta un enfermedad cu ta causa hopi daño na e pais y ta un inhusticia grandi contra e pueblo. CURPA lo bin cu cambianan structural cu lo minimaliza patronahe politico na un forma cu no ta desastroso pa Aruba. E cambianan structural lo ta:

- a. Cada minister no mag tin mas cu 16 persona como ambtenaar, arbeidscontractant, consultant of cualkier otro forma trahando den nan buro como empleado of relacion laboral nobo ariba payroll di gobierno.
- b. E cantidad di minister no mag surpasa 7 excluyendo e gevolmachtigde minister na Hulanda.
- c. Nonbramento di ambtenaar, promocion etc. ta wordu saka for di e poder di e minister, ministerraad y gobernador y pasa pa e director di departamento y otronan. Lo cambia e ley LMA pa hasi esaki posibel.
- d. Mientras cu e ley LMA no ta cambia lo tin un personeelsstop den e aparato gubernamental

excluyendo kader personeel (HBO y WO) y e personanan cu mester wordu nombra na buro di minister.

e. Tur contract laboral firma politicamente cu salario barbaro lo wordu termina.

f. Tur contract di huur cu ta termina lo no wordu prolonga y otronan lo wordu cancela. Lo no huur ningun edificio mas si no ta den casonan di emergencia manera candela.

#### 6. NO TA PERMITI CORUPSHON DEN POLITICA, APARATO GUBERNAMENTAL Y HUSTICIA

Pa combati e corrupshon den politica, aparato gubernamental y husticia, partido CURPA lo bin cu:

a. Un ley di "klokkenluider" cu lo recompensa y proteha esnan cu tin informashon clave di actonan di corrupshon cu ta tuma lugar den politica, aparato gubernamental y husticia.

b. Un investigashon independiente y parlamentario pa investiga casonan sospechoso di corrupshon pa asina esnan culpabel wordu persigue. E ta importante cu un ehemplo ta wordu duna na pueblo cu gobierno no ta tolera corrupshon di ningun forma.

#### 7. PARLAMENTARIO Y MINISTER TIN MES UN BENIFICIONAN CU AMBTENAAR

E manera inhusto cu parlamento a regla nan benificionan mester wordu hasi husto back.

CURPA lo:

a. Subi edad di penshon di un parlamentario y minister igual na esun di ambtenaar.

b. Hisa e cantidad di aña pa cobra penshon di un parlamentario pa 16 aña y pa un minister 8 aña.

c. Parlamentario y minister mester paga prima pa nan penshon igual na esun di un ambtenaar.

d. No ta permiti acumulacion di penshon pa politico. Ta cobra solamente 1 penshon.

e. Un parlamentario ta bula 'economy class' pa viahenan di trabow.

f. Baha e diferente toelagen di un parlamentario y minister na sumanan razonabel.

f. Ta duna daggeldvergoeding ora di biaha pa trabow di un parlamentario y minister igual na esun di un ambtenaar y ta obliga di duna cuenta na final di e biaha.

g. Cambia e overbruggingstoelage actual na uno na unda un parlamentario por solamente cobra un overbrugginstoelage si e no tin un trabow y te un maximo di 3 luna.

#### 8. CRIMINALIDAD Y ACTONAN CASTIGABEL LO WORDU PREVENI Y CASTIGA DEBIDAMENTE

CURPA ta kere cu criminalidad y actonan castigabel mester wordu preveni y castiga debidamente. Pa logra esaki CURPA lo:

a. Hisa tur castigo minimo y maximo di actonan castigabel drasticamente den e Strafverordening.

b. Bin cu un ley na unda cu e victima di un asalto ariba su cas, tereno of propiedad ta wordu proteha si e tin di usa forza pa defende su cas, tereno of propiedad.

c. Lo bin cu cameranan den centro di ciudad y areanan turistico y lo amplia esaki rond di Aruba pa capta actonan castigabel di personanan pa asina nan por wordu persigue.

d. Lo introduci den tur auto di polis camera pa proteha e polis y tambe e sospechoso ora di un aresto.

#### 9. CORTE DI HUSTICIA NA ARUBA LO CONSISTI DI HUEZNAN CU TIN E FE CRISTIAN.

Nos por ripara cu husticia na Aruba ta laga hopi di desea. Hueznan liberal y irresponsabel ta impone castigonan mucho abow, ta permiti inmoralidad y pa motibonan di incompetencia ta

laga hopi di desea den nan sentencianan especialmente contra e homber chikito. Tipo di Hueznan asina no ta bon bini na Aruba. Partido CURPA lo exige solamente hueznan cu tin e fe cristian y cu ta competente. Como nashon di Dios nos mester Hueznan cu ta kere den un Dios y cu no ta actua como uno.

#### 10. ARUBA LO NO HASI DEBE MAS.

Debe ta maldishona un pais y ta pone e pais den un relacion di esclavitud cu esnan cu nan debe. CURPA lo percura cu e debe no lo crece mas y wordu paga mas liher cu ta posibel. Un maneho financiero husto Dios lo bendishona. Aruba a conoce manehonan financiero in husto. E situacion actual di debe ta un acumulacion di patronahe politico y corrupshon hasi dor di gobiernonan na mando na nan sponsernan, famia, amigonan, campanjadornan etc. Pa no hasi debe mas CURPA lo bin cu un presupuesto balansa na unda e principio ta no gasta mas cu bo entrada. E ta nos deber di ta un bon cuidador di e plaka. CURPA lo cuida e plaka di Dios ariba un manera husto y corecto.

ARUBA MESTER DI UN FUNDESHI NOBO PA UN ARUBA NOBO. E 10 MANDATONAN NO-NEGOTIABLE MENCIONA LO CREA ESAKI.

CURPA TA PONE DIOS PROME, ABO TAMBE?